

## Ami!...No Nan, Ni Nos

Maske nos tur tin diferente perspektiva, nos tur ta preokupá pa ku loke ta pasando den nos komunidad. Nos diferente punto di bista tambe ta produsí diferente opinion kiko e solushon ta.

Algun hende ta kla pa tira e falta riba gobernantenan pa e situashon ku ta eksistí. Nan ideologia, nan koló polítiko, nan maného, nan desishonnan, nan uso di sèn di pueblo, nan integridat, èts. ta mirá komo origen di problema na nos isla. **Nan** mester solushoná e situashon kaótiko ku nos ta haña nos aden.

Pa otronan, edukadónan tin e yabi ku ta lòk un porta riba un etapa desagradabel den nos historia i ta habri porta pa un era nobo glorioso. Segun nan, talbes e problema ta e edukashon ku e mener i yùfrounan mes a risibí, e kuríkulo, henter e filosofia di edukashon, falta di tempu pa eduká alumnonan, mal ehèmpel di parti di dosentenan, èts. Si **nan** lo hasi mihó trabou ku edukashon di nos yunan, tur nos problemanan lo pasa pa olvido!

Telebishon ta enkurashá violencia, vulgaridat, immoralidat, falta di respèt, cambio den étika, segun un punto di bista. Lo tin un transformashon positivo si programadónan, produktornan di pelíkula, artistanan di sine, èts. a bira mas responsabel.

Segun un otro perspektiva, mayornan tin falta. Tata kasi nunca ta presente i awor mama tambe a bai traha. Mayornan no ta duna edukashon na nan yunan manera debe ser. Si **nan** tuma nan responsabilidat na serio, tur kos lo kuminsá kana bon atrobe.

I tin mil i un otro grupo òf persona ku nos por mostra dede riba komo responsabel pa e ‘tutu’ aktual i ku por kambia e situashon. Algun ta konvensé ku ta polis. Otronan ta haña ku ta drogadiktonan, trafikante di droga, e kartelnan na Colombia. Tin hende ku ta kere ku e fayó ta sinta ku sindikalistanan. Kisas ta gerensia di kompanianan; talbes ta empleadonan. Pastornan no ta hasi nan trabou manera debe ser. Por ta músiko òf deportistanan. Por ta e pais di Hulanda, òf Merka.

Sin duda hopi di e perspektivanan aki tin rason. Ma tòg tin un punto den tur esaki ku ta molestiámi. Ta fásil pa tira falta riba un person òf un grupo, espesialmente ora e grupo ei no ta inkluí mi mes. Asta no ta dje difisil pa mostra un dede akusante riba un grupo di kua mi mes ta forma parti, basta ku e ta un grupo mas amplio, manera “empleadonan” òf “mayornan”.

Sinembargu, ora bo ta papia di **nan** (un generalisashon ku ta ekskluí bo mes) òf **nos** (un grupo ku ta inkluí bo mes), esei ta un manera kumbiniente pa ekskluí un otro pronòmber importante: “**ami**”. Ta fásil pa bisa, “**Nan** a dañá kos, **nan** mester kambia, **nan** mester drecha.” Nos ta tende ekspreshonnan asina tur dia! Asta por tende, “**Nos** mester kambia, **nos** mester drecha.” Ma ki dia tabata último biaha ku bo a yega di tende un hende bisa, “**Ami** a dañá kos, **ami** mester kambia, **ami** mester drecha”? Nos ta tira kulpa riba otro hende i saka nos mes kurpa liber.

**Ora bo ta bisa “nan” i “nos”, bo ta nenga tuma responsabilidat pa bo fayonan.** Segun e perspektiva ei, tur otro hende tin kos di drecha, ma ami nò! Bo ke pa tur otro hende kambia. Ma kiko abo i ami mes ta hasi? **Si tur hende tin e perspektiva ku nan tin ku kambia, anto nunca kos lo kambia pasobra tur hende ke pa otro hende kambia.**

Palabra di Dios ta laga sa bon kla ku kada persona individual ta responsabel dilanti Dios. “...*kada un di nos lo duna kuenta di su mes na Dios*” (Romanonan 14:12). “...*nan a wòrdu huzgá, kada un di nan segun nan obranan* (Revelashon 21:13).

Laga nos stòp di generalisá. Laga nos stòp di wak pafó di nos isla, pafó di nos barío, pafó di nos kas, pafó di nos mes pa buska un “zondebok” pa tira kulpa riba dje. Laga kada un di nos—**kada ami**—apliká loke nos sa nos tin ku hasi. Laga kada un di nos evaluá i puntra nos mes: **kon ami tin ku kambia?**